

# 'MUQARNAS' DIANGKAT TEMA KONVOKESYEN KE-13 USIM TAHUN INI

Majlis  
Konvokesyen  
ke-13  
مجلس كونيوكيشن ك-13  
UNIVERSITI SAINS ISLAM MALAYSIA  
7, 8 & 9 November 2015 - 25, 26 & 27 Muharam 1437H  
Kementerian Pendidikan Tinggi  
USIM

NILAI – Majlis Konvokesyen Universiti Sains Islam Malaysia (USIM) tahun ini yang bakal diadakan pada 7 hingga 9 November memilih untuk mengangkat konsep Muqarnas sebagai tema reka bentuk konvokesyen kali ini. Setiap tahun, konsep reka bentuk majlis konvokesyen USIM dipelbagaikan mengikut tema tersendiri yang berkaitan dengan Islam dan antara yang pernah diangkat adalah lebah, minyak zaitun, makanan sunnah dan burung hud-hud.

Konsep Muqarnas ini diterjemahkan dalam reka bentuk buku konvokesyen, hiasan pentas utama graduan, kad jemputan dan lain-lain. Ia dipilih sebagai konsep Majlis Konvokesyen Ke-13 USIM sebagai manifestasi penghargaan dan meraikan graduan sulung seramai sepuluh

orang daripada Program Ijazah Sarjana Muda Sains Seni Bina dengan Kepujian. Ia ditawarkan di Fakulti Sains dan Teknologi dan menerima pelajar pertamanya pada sesi kemasukan akademik 2012/2013.

Muqarnas, iaitu salah sebuah binaan yang paling asli dalam seni bina Islam, tanpa merujuk kepada mana-mana ketamadunan sebelumnya. Pengkaji senibina Islam menjangkakan Muqarnas berasal daripada Baghdad, berdasarkan beberapa kubah bercirikan Muqarnas yang ditemui seawal 879 (1468).

Muqarnas merupakan elemen dekorasi tiga dimensi pada bahagian dalam kubah bangunan, yang diinspirasi oleh komposisi geometri sarang lebah. Perkataan muqarnas berasal dari Bahasa Arab, yang bererti kubah stalaktit.

Dari sudut pandangan seni bina, muqarnas bukanlah sekadar elemen dekorasi semata-mata. Tekstur tiga dimensi yang dimilikinya, membuatkan muqarnas memantulkan dan menyerakkan cahaya yang masuk dari luar, ke ruang yang berada di bawahnya.

Dengan demikian, ruang mendapatkan penerangan difus yang rata dan tidak menyilaukan. Muqarnas dapat juga berfungsi sebagai elemen akustik bagi ruang di bawahnya. Relung-relung yang terdapat pada muqarnas berfungsi sebagai alat penyerapan dan refleksi difus suara.

Dalam menyelidiki makna, perulangan-perulangan reka bentuk yang mengalir seolah tanpa akhir dalam muqarnas, ia merupakan gambaran konsep keyakinan manusia akan kekuasaan Allah SWT yang tiada

batasan. Pola-pola perulangan dan berterusan dalam seni dekorasi Islam, sebahagian besar dijiwai oleh kesedaran makhluk akan kebesaran dan kekuatan Allah SWT yang tanpa batas.

Menjelang Majlis Konvokesyen USIM bermula Sabtu ini yang bakal meraikan 2498 orang graduan, persiapan akhir oleh Universiti giat dijalankan terutama bertempat di Dewan Tuanku Canselor. Selari dengan pertambahan graduan saban tahun, sidang kali ini dibahagikan kepada lima sidang berbanding empat sidang pada tahun-tahun sebelumnya.

DYMM Tunku Ampuan Besar Negeri Sembilan, Tuanku Aishah Rohani Binti Almarhum Tengku Besar Mahmud selaku Canselor USIM akan berangkat mencemar duli merasmikan Istiadat Pembukaan Majlis Konvokesyen Ke-13 USIM pada Sabtu nanti.